

**BOSTON
PUBLIC
LIBRARY**



REQVESTE

PRESENTEE AV
ROY ET A LA ROY-
NE PAR LE TRI-
VMVIRAT.



Avec la responce faicte par monseigneur
le Prince de Condé.

M: D. LXII.

WEST COAST

WESTERN

FOR ALL

WE HAVE

WHAT


3

THE SOUTH COAST
OF ENGLAND

THE END

REQVESTE PRESEN-
TEE AV ROY ET A LA
ROYNE PAR LE
TRIVMVRAT.



 VOUS Duc de Guyse, pair, grand maistre & grād chambellan de France, Duc de Montmorency, pair & Connestable de France, de saint André, Marechal de Frāce: à ce qu'il soit notoire à vos Maiestez & à tout le monde, que nos cœurs & intentions assez cogneus & declarez par toutes actions passees, & tout le cours de nos aages & vies employees & despēdues non ailleurs qu'au loyal & fidele seruice des Maiestez de nos bons defuncts Roys (que Dieu absolue) à la cōseruation & augmentation de leur honneur, grandeur, estat & couronne, ne furent iamais, ne sont auiourd'huy, & ne seront (Dieu aydant) de nos vies autres que tēdāns à la mesme bonne & loyalle fin que dessus, & par moyēs iustes, raisonnables, legitimes & louables. Aquoy nous auons voué (apres le seruice de Dieu) le demeurant de nosdictes vies, biens & fortunes.

Supplions treshumblement les Maiestez de vous, Sire, & de vous, Madame, entendre le fonds de nos in-

centions & pensees, que nous vous descouurons & manifestons en toute syncerité, par cest escrit: ensemble les causes de nostre venue & seiour pres de vos maiestez: & pour lesquelles nous estimons en nos loyautez & consciences (veu les estats & charges que nous auons) ne nous en pouuoir ne deuoir aucunement departir, sans encourir note & reproche perpetuelle pour nous & nostre posterité, d'estre infideles seruiteurs & officiers, desertours de l'honneur de Dieu, & du bien de son Eglise, de l'honneur, bien, salut & incolumité du Roy & de nostre patrie, & de la paix & repos de l'estat d'icelle: que nous voyons sur le poinct d'euidente & ineuitable ruine, s'il n'y est promptement & sans aucun delay pourueu, par le seul remede des ordonnances que nous estimons deuoir par vos Maiestez estre faites, sceelées, emologues & approuuees tāt en vostre grand cōseil, qu'en la Cour de Parlemēt de Paris, & autres Cours de vostre Royaume, telles qu'elles sont cōtenues aux articles suy-uans, qu'en toute reuerēce & humilité nous proposons.

Premierement nous estimons necessaire, non seulement pour l'acquit de nos consciences, mais pour l'acquit de la conscience du Roy, & du serment par luy fait à son sacre, pour le repos, vnion de tous ses subiects, & pour ne confondre tout ordre diuin, humain & politique: de laquelle confusion depend & s'ensuit necessairement l'euerſion de tous Empires, Monarchies & re-publiques. Que le Roy par Edict perpetuel declare qu'il

ne veut & entend authoriser, approuuer ne souffrir en son Royaume aucune diuersité de Religion, ny d'Eglise, predications, administrations de Sacremens, assemblees, ministeres ne Ministres Ecclesiastiques. Ains veut & entéd la seule Eglise catholique, Apostolique & Romaine, receue, tenue & approuuee de sa Maiesté, & de tous ses predecesseurs, les prelats & ministres d'icelle, predications, administrations de sacremens d'eux & de leurs commis auoir lieu en tout son Royaume & pays de son obeissance: toutes autres assemblees pour tel effect reiettees & reprouuees.

Que tous officiers de France, domestiques de sa Maiesté, & de mes seigneurs ses freres & seur, tous officiers, tant de iudicature que de la milice, comptes & finances de ce Royaume, & autres ayans charge, administratiōs ou commissions de sa Maiesté, tiendront & obseruerōt la mesme Religion, & en feront expresse declaration. Et les refusans, delayans ou cōtreuenans seront priuez de leurs estats & offices, gages, charges & administrations ou commissions: sans pour ce toucher à leurs biēs ny à leurs personnes, sinon qu'ils fissent tumulte, sedition, monopole ou assemblees illicites.

Que tous les Prelats, beneficiers & personnes Ecclesiastiques de ce Royaume feront semblable confession. Et les refusans ou contreuenans seront priuez du temporel de leurs benefices: qui sera regy sous la main du Roy, & gens de bien & de bonne Religion, commis à

l'administration d'iceux par les superieurs, & ceux à qui il appartient y pourvoir. Lesquels, selon qu'ils verront estre à faire, les priueront du tiltre, & pourvoiront d'autres en leur lieu, par les voyes deues & legitimes.

Que toutes les Eglises violees, desmolies & spoliees en ce Royaume, au grand mespris de Dieu & de son Eglise, du Roy, ses ordonnances & Edicts, tant anciens que modernes (qui tous ont prohibé tels sacrileges sur peine de la vie) soyent reintegrez, reparez & restituez entierement en leur premier estat & deu, & les interests satisfaits de tous les dommages soufferts: & les delinquans infracteurs des Edicts violez & spoliateurs punis comme il appartient.

Que les armes prinſes en ce Royaume par quelque personne que ce ſoit, pour quelque couleur, raiſon ou occaſion que ce puiſſe eſtre ſoit, ſoyent laiſſees & oſtees par ceux qui les ont prinſes, ſans expreſ commadement du Roy de Nauarre, lieutenant general de ſa Maieſté, & representant ſa perſonne en tous ſes Royaumes & pays de ſon obeiſſance. Et ceux qui ſe ſont ainſi armez, & perſeuerent encores à preſent, declarez rebelles & ennemis du Roy & du Royaume.

Qu'audict Roy de Nauarre ſeul (comme lieutenant general de ſa Maieſté, & representant ſa perſonne) & à qui de par luy ſera ordonné & commis, ſoit loiſible auoir & aſſembler forces en cedit Royaume, pour l'execution & obſeruation des choſes deſſusdictes, & autres

qui pourront estre aduisees , pour le bien du Roy & de son Royaume.

Que les forces ia commencees à assembler par ledict seigneur Roy de Nauarre, pour le seruice de sadiete Maiesté , pour les effectz que dessus , soyent maintenues & entretenues soubz son autorité pour quelques mois. Dedans lequel temps on espere , si c'est le bon plaisir de voz Maiestez, voir le fruiet des remedes que dessus, & le repos de ce Royaume.

Les autres prouisions necessaires & requises tendans au bien & repos de ce Royaume , qui pourroyent estre ici par nous obmis , soyent prinſes & suppléees du conseil & aduis qui fut donné par la Cour de Parlement à Paris: lors que dernièrement vous enuoyastes vers elle le sieur d'Auanson, pour auoir son auis sur les remedes qui luy sembloient conuenables , pour pouruoir aux troubles de ce Royaume, & sur ce que ladiete Cour y pourra presentement adiouster.

Ces choses faictes & accomplies entierement, comme dessus (sans lesquelles nous tenons ce Royaume ruiné) nous sommes prests de nous en aller chacū non seulement en nos maisons , s'il nous est commandé & ordonné, mais au bout du mōde (si besoin est) en exil perpetuel: apres auoir eu contentement en nostre ame, d'auoir rendu à Dieu, à nostre Roy à nostre patrie, & à nos consciences, l'honneur & seruice , l'amour & charité & tout autre fidele office que nous leur deuōs, en si grand

& euident , si important & notable peril & necessité. Pour ausquels obuier nous sommes prests de sacrifier, & vouer nos vies , & tout ce que nous auons de cher & precieux en ce monde. Ce que nous signifions à vos dictes Maiestez , & au Roy de Nauarre, tant pour nous en estre tesmoins & iuges, que pour mettre aux incôueniens que vousvoyez les remedes dessusdits, q̃ nous estimons estre tresnecessaires & seuls cōuenables : afin qu'il vous plaise en declarer vostre volonté & resolution.

Protestans deuant Dieu & vos Maiestez, que la nostre telle que dessus ne tend qu'au bien & salut du Roy & de son Royaume: & que nous estimons que ceux qui l'auront en recommandation, ne se pourront esloigner des choses cy dessus recordees & remōstrees en cest escript: que nous auōs signé de nos mains, pour lacquiēt de nos consciences, & nostre descharge enuers Dieu, vos Maiestez & tout le monde à l'aduenir. Faict à Paris ce quatriesme iour de May. L'an mil cinq cens soixante deux. Signé François de Lorraine, de Montmorency, saint André

AVTRE

A V T R E R E Q V E S T E

P R E S E N T E E A L A R O Y N E

ledict iour, par ledict Triumvirat.



A D A M E , outre le contenu en l'escript que nous auons ce iour d'huy présenté à vostre Maiesté, & lequel nous entendons & esperons (auecques vostre congé & bonne licence) faire manifester & publier par toute la Chrestienté: afin de donner plus d'occasion à vos Maiestez de s'asseurer que nous desirós soubmettre nos opinions au iugement de vostre Maiesté, & du Roy de Nauarre, & chercher toute pacification pour ce Royaume. Apres qu'il vous a pleu nous declarer que le Roy, ne vous, ne nous commanderiez iamais de nous retirer de vostre Cour.

Moyennant que ceux d'Orleans se desarment, & que les pays, villes & places de ce Royaume rendent entiere obeissance à vos Maiestez, & que tous facent serment d'obeir au Roy (comme à leur souuerain & naturel seigneur) & à tous les Edicts & ordonnances qui sont ia & pourront cy apres estre faicts par sa Maiesté, par l'aduis de son conseil, & emologuez par sa cour de Parlement de Paris: demourans les forces entre les mains du Roy de Nauarre, Lieutenant general du Roy, & represen-
Bj.

tant la personne, en tel nombre, telles, & pour tel temps qu'il sera aduisé estre necessaire. Sans & au parauant l'accomplissement desquelles choses nous estimons en nos loyautez & consciences (pour les estatx & charges que nous auõs) ne nous pouuoir ne deuoir departir de vostre Cour & suite, sans encourir note & reproche perpetuelle pour nous & nostre posterité, d'estre infideles seruiteurs & officiers, deserteurs de l'honneur, bien, incolumité & salut du Roy & de son Royaume, de nostre patrie, & de la paix & repos de tous les estatx d'icelle : que nous voyons sur le poinct d'euidēte & ineuitable ruine, s'il n'y est promptement & sans aucun delay pourueu.

Nous offrons de nous retirer chacun en l'vne de nos maisons, pour obeir au Roy de Nauarre, en tout ce qu'il nous sera commandé. Durant laquelle nostre absence, tant s'en faut (Madame) que nous desirons ne requerõs de monsieur le Prince de Condé semblable retraicte, en l'vne de ses maisons, que nous souhaitons sa presence pres de vos Maiestez : & vous supplions l'en vouloir au plustost approcher, & retirer hors du lieu & compagnie où il est. Ne pouuans ne voulans esperer d'un tel Prince que chose digne du sang d'ou il est yssu. Faict à Paris le quatrieme de May. Lan mil cinq cens soixante deux. Signé François de L'orraine, de Montmorancy, Saint André.

F I N.

RESPONSE FAICTE PAR MONSIEUR LE PRINCE de Condé, à la requeste presentee par le Triumvirat.



ENcores que par plusieurs escripts qui ont esté publiez, & autres moyes, i'aye assez amplement deduiet les causes qui m'ont meu à prédre les armes, & avecques quelles conditions i'estoye prest à les laisser & me retirer en ma maison : Toutesfois il n'a esté possible de retirer de ceux qui tiennēt le Roy & la Royne en leur puissance, autres parolles que comminatoires, pleines de reproches & de menaces. Et mesmes du cōmencement que ie fus à Orléans, auant qu'auoir entēdu ce que ie vouloye dire, enuoyèrent icy des lettres & des commandemens si rigoureux, & en termes si outrageux : comme s'ils eussent eu affaire à des larrons de campagne, & voleurs publiques. Et ayans cogneu que ie ne tenoye compte de leur indiscrete façon de faire, & que leurs choleres & artifices ne me pouuoient diuertir du chemin que i'auoye cōmencé de tenir (qui estoit de cōtinuer en ma demande iuste & raisonnable, & qui n'est fondee sur ma passion, sur mō profit, ny sur mon ambition : ains sur le zele que i'ay & doy auoir à la liberté du Roy & de la Royne, & au bien & repos de ses subiets) ils se sont aduisez de presenter

B.ij.

à leurs Maïestez vn escript, qu'ils appellent vne Reque-
ste, en toute humilité & reuerence: mais sans la regarder
de pres, & ne faire que passer par dessus, lon iugera que
c'est vn arrest, & non pas vne Requête. C'est vne deli-
beration conclue & arrestee par les trois Requerans, qui
sont le Duc de Guyse, Conestable, & le Marechal saint
André, avec le Legat, le Nunce du Pape, & l'Ambassa-
deur des estrangers. Et ceux qui depuis six mois ont
pris garde à leurs pratiques & menees, pourront tes-
moigner, & avecques verité, que ceste conclusion a esté
fondée non pas sur le zele de la foy & de la Religion,
mais sur la finesse, artifice & ambition desdits trois re-
querans. Lesquels se voyans hors de la Cour, non pour
desplaisir qu'ils y eussent receu, mais parce que de tout
temps ils n'ont peu endurer vn Prince du sang aupres
des Roys, & aussi qu'ils voyoyent bien que la Royne
tendoit plus au proffit du Roy & soulagement du peu-
ple, qu'à les cōtenter, ou (pour mieux dire) à saouler leur
auarice ia cognüe & detestee d'un chacun: ils se rallie-
rent ensemble, & chercherent vn moyen de reuenir en
leur grandeur, & reprendre l'autorité de commander
plus grande qu'ils n'eurent iamais. Et sçachans bien
qu'ils ne pouuoient attendre aucun secours ny du peu-
ple ny de la noblesse, & que tout hōneste pretexte, tous
moyens, toutes faueurs & assistēce des subiects du Roy
leur defaudroyent (tant ils se sont bien portez du temps
qu'ils ont gouuerné) ils fonderent leur dessein sur la re-

ligion, esperans que les prebstres & ceux qui en dependent, & ont quelque interest avec cest ordre, leur donneroyent secours de gens & d'argent. Et pour s'asseurer de la victoire, appelerent à leur pratique les estrangers. (Et cela se verra, & fera quelque iour iugé, à fin que ceux qui viennent apres nous, y prennent exemple.) Et ainsi preparez & appuyez sur folles & vaines esperâces, conclurent d'appeler tous leurs amis: cōme ils ont fait de tous les endroits de ce Royaume, qui toutesfois ne se sont pas trouuez en grand nombre. Conclurent de venir trouuer le Roy & la Royne en tel equipage, qu'il ny auroit personne qui osast cōtredire à leurs commandemens. Et pour mieux s'asseurer de pouuoir longuement regner, feirent vn roolle de ceux qui deuoyent mourir, & de ceux qui deuoyent estre bannis, & d'une infinité d'autres, qui deuoyent estre demis de leurs estats, & priuez de leurs biens. Au premier rang estoit monsieur le Chancelier, & plusieurs bons personnages du conseil priué, & autres tenans lieux honorables apres de leurs Maiestez. Les hommes estoient ia choisis & esleus, pour tenir la place de ceux qui seroyent ou meurtris ou exilez. Et Dieu a voulu qu'ils ont monstré leur bon iugement, par les six qu'ils ont esleu du conseil priué, en lieu des six qu'ils vouloyēt chasser. La comparaison des vns aux autres est telle que les enfans sont cōtraincts d'en faire des chansons. La Royne deuoit estre enuoyee à Chenonceau, s'occuper à faire des iardins.

Monſieur le Prince de la Roche ſurion, Prince du ſang, ſage & vertueux, deuoit eſtre eſloigné du Roy, & le lieu qu'il tient donné & aſſigné à autres, qui inſtruiroyent la ieuneſſe de ſa Maieſté à n'oyr iamais parler de Dieu, ny de ce qui peut nourrir ſon eſprit, qui de ſoy eſt enclin à toutes choſes bonnes, ſainctes & louables. Et encores moins l'inſtruiroit-on d'entēdre luy-meſmes à ſes affaires, & ſe ſeruir des hommes pour miniſtres, & non pas pour maiſtres, donner audience à vn chacun, honorer ſa nobleſſe, aymer les armes pour la neceſſité, tenir la main à la Juſtice, ſoulager ſon peuple, & ſingulieremēt fauoriſer les pources, & les garder de toute oppreſſion & violence: & ſur tout de n'admettre iamais pres de luy vne Idole, c'eſt aſſauoir homme qui face le Roy, & qui ſoubs pretexte ou d'amitiē ou de lōgue ſeruitude vſurpe ſon autorité ſur ſes ſubiets. C'eſt la nourriture que la Royne a baillee à noſtre Roy, & qui deſplaist à ces ſeigneurs: qui deſirent le former à leur façon, & en faire vn Roy qui ſçaache biē baller, picquer vn cheual, porter bien la lance, faire l'amour, aymer (cōme lon dit) plus la femme de ſon voiſin que la ſienne, & au reſte qu'il ſoit ignorant. Car il n'appartiēt pas à vn Roy (ce diſent-ils) de ſçaauoir quelque choſe. Qu'il tienne ſa reputation avec vne grande grauité, à l'endroit des pources gens qui ont affaire à luy: qu'il agrādiffe ſes ſeruiteurs, & remette ſur eux tous ſes affaires & le gouuernemēt de ſon Royaume: qu'il ne donne audiēce à perſonne, qu'il ne voye

iamais lettres, ne qu'il en signe aucune de sa main, afin qu'il ne puisse descouvrir les trôperies qui se font sous son cachet: qu'il ne tienne compte que de trois ou quatre choisis par luy, qui s'entrebatēt à qui sera le premier, & qui aura plus de moyen de piller: qu'il soit prodigue pour ses fauoris, chiche & mechanicque pour tous les autres: qu'il soit cruel enuers son peuple, qu'il le despouille de toute sa substâce: que les estats de iudicature soyent vendus à deniers comptans, & à leur profit, & qu'ils soyent baillez és mains d'hommes ignorans, auares & ennemis de la iustice. Et en fin, que la maison du Roy soit triomphâte en vanité & superfluité d'habillemens, de doreures, & vn receptacle de gens de mauuaise vie. Je ne dy point cecy sans cause: & chacun peut entendre ce que ie veux dire, & la Royne en sçait des nouuelles. Ces seigneurs donc qui presentent ceste requeste, ont fait ceste belle ligue plus dommageable & pernicieuse à ce Royaume, & plus sanguinaires, que ne fut celle de Sylla, celle de Cæsar, & depuis, celle du Triumvirat de Rome. Et l'auroyent desia executee, n'eust esté la grace que Dieu m'a faite à leur resister. Et m'esbahy qu'ils soyent tant asseurez en leurs visages, de tenir deuant la Royne le propos qu'ils tiennent. Encores plus suis-ie esbahy de ladicte Dame, qui a patience de les escouter: attendu que dés qu'ils cōmencerent à faire leurs menees, elle en fut aduertie, & a sceu iour pour iour, ce qu'ils ont fait, & ont voulu faire. Et à ceste heure elle

prend leurs bonnes parolles, tout ainsi cōme si elle n'auoit esté informee de leur intention. En quoy elle monstre bien qu'elle est vrayement prisonniere, & plus que prisonniere. Car d'un acte si malheureux, & qui meriteroit vne vëgeance publique, & duquel elle a esté pleinement informee, elle faict semblant de ne l'auoir iamais sceu ny pësé. Et sans la peur qu'elle a d'estre estranglee en son liët (cōme lon la fait menacer tous les iours, & de ce ie m'en rapporte à son serment) elle n'eust pas failly de reietter leur requeste, & leur reprocher que pour leur auarice & ambition ils sont cause de tout le trouble. Et puis que le danger où elle est presentement, empesche qu'elle ne peut ny ose recognoistre le faict comme il est, & respondre à ceux qui par belles parolles luy veulent desguiser les matieres: ie suis cōtraint, pour soustenir l'autorité du Roy & la sienne, respondre à leur demande & au nom de leurs Maiestez: de la liberté desquels ie me suis rendu l'un des defenseurs. Esperant que si lesdicts requerans ne veulent recognoistre leur faute, Dieu m'assistera, & favorisera la bonne intention qu'il m'a donnee: & que tous les bons suiets du Roy se iointront avec moy pour deliurer ce pource Royaume des mains de ceux qui le veulent tyranniser.

Au commencement de leur escrit, pour donner lustre, & auctoriser leur dire, ils mettent leurs qualitez: ils mentionnent fort honorablemēt leurs grans & loyaux seruices, & veulent que de leurs actiōs passees, lon puisse
iuger

iuger de leur cœur & de leur intention.

Mais il n'estoit besoin de faire vn si beau commencement (selon leur aduis) pour faire vne si mauuaise fin. Car quand ils seroyent encores plus grãs qu'ils ne sont, quand leurs seruices seroyent dignes de plus grande recommandation qu'ils ne disent, encores ne s'ensuyuroit il pas que leur faute, qui est presente & si grãde & si apparette, deust estre couuerte, & encores moins acceptee pour œuure bonne & raisonnable. Et si quelques vns d'entre eux ont fait des seruices (comme certes ie confesseray tousiours) si ne faut-il pas que s'ils n'en ont esté recompensez, ils le veulent estre à present par la ruyne du Roy & de tout son Royaume. Mais graces à Dieu, ils sont si bons peres de famille tous trois, & aymãs tant leur profit, qu'ils n'ont si longuement attëdu à demander & en prendre la recompense. Tesmoing deux cens cinquante mille liures de rente, & vn milion d'or en meubles qu'ils possèdent aujourd'huy plus de ce que leurs peres leur ont delaishtë: outre trois cens mille liures de rête que les leurs tiennent du bien de l'Eglise. Et s'ils ne se contentent des biens & des honneurs qu'ils ont receu des predecesseurs Roys, & que pour respondre à leur naturel il faille nombrer parmy les droicts de recompense quelques vengeance particulieres: en cest endroit ont-ils esté assez satisfaiçts. Et qu'il leur souuienne de tant de bons & notables personnages qui furent emprisonnez sans charges ny informations, à leur

C.j.

requeste, tant de charitez qu'ils ont prestees à plusieurs bons seruiteurs du Roy, tant de maisons perdues, & honorables familles apouries durant les regnes des Roys François premier, Henry, & François second. De sorte qu'ils se sont aydez de la faueur de leurs Maiestez, non seulement à s'agrandir & enrichir, mais à appourir les autres, & se venger de leurs haines particulieres. Et s'ils veulent que leur intention soit (comme ils disent) cogneue de leurs actions passees, il sera facile de iuger que leur dessein est tel que tous les b^os subiects & seruiteurs du Roy s'y doiuent opposer, & avecques toutes leurs forces y resister.

Ils disent par apres, qu'il faut craindre vne euidente & ineuitable ruine, si par eux n'y est promptement remedié. Et à ces fins presentent des articles avec toute humilité & reuerence. Mais qui leur demanderoit qui est cause de ceste ruine, & qui l'a cerchee & procuree: s'ils vouloyent dire la verité ils seroyent contrains de reietter la coulpe sur eux-mesmes. Car apres la publication de l'Edict de Ianuier il y auoit paix & vnion vniuerselle par tout ce Royaume. Et ne sauroyent nier les deux (c'est assauoir le Conestable & le Mareschal saint André) que tant qu'ils eurent opinion que ceux de la Religion reformee ne se contéteroyent de l'ordonnance qui auoit esté faite, ils firent semblant de la trouuer bonne, & de l'approuuer: iurerent entre les mains de la Royne (aussi fit le Roy de Nauarre, & tous les autres du

conseil) de la faire maintenir en leurs gouuernemens, & de ne parler d'y dispenser, ou faire contreuenir, pour vne part ou pour l'autre. Mais quãd ils virent que ceux de ladicte Religion auoyent promptement obey aux commandemens du Roy, ils essayèrent de susciter l'autre partie. Et toutesfois ils eurent si peu de suite, qu'ils ne trouuerent personne pour leur seruir de ministres que le Preuost des marchans, Marcel, & dix ou douze crocheteurs. Tellement que le duc de Guyse fut contraint d'y mettre la main luy-mesmes à Vassy, & tailler en pieces ce pource peuple faisant leurs prieres. Le Connestable n'ayant peu surprẽdre l'Eglise de Paris, espan-dit sa cholere sur les chaires des predicants, & sur les maisons où les assemblees se faisoient qu'il fit brusler, & voler quelques maisons de ceux de ladicte Religion. Et ne se faut esbahir si lon a prins la reuãge sur les images en plusieurs endroits de ce Royaume. Parquoy s'ils estiment que la diuision du peuple soit la ruine qu'ils disent estre si euidente, ils en sont les auteurs : & pour tels doiuent estre cogneus & blasmez. Et quant à l'humilité & la reuerence qu'ils presentent au Roy & à la Royne, encores n'ay-ie point veu qu'ils ayent obey à commandement qui leur ait esté fait de la part de ladicte Dame. Mais ie sçay bien qu'ils ont tous trois refusé d'aller en leurs gouuernemens : ie sçay bien qu'ils n'ont voulu venir à Monceaux: comme ie fey moy, quand la Royne le nous commanda.

Ils sont venus armez à Paris, contre son commandement: ils n'en ont voulu sortir, quelque priere qui leur en ait esté faicte. Et i'en suis fortuy pour obeyr a la volonté de leurs Maiestez. Ils s'ot allez trouuer le Roy & la Royne en compagnie armee: combien que cela leur eust esté expressement defendu. Ils les ont tiré de Fontainebleau, & les ont menez à Melun, & de Melun à Paris: & le tout par force. Et de ce ie m'en rapporte à la conscience de la Royne, & à son serment, ou à sa parolle, quand elle sera en sa liberté d'en pouuoir dire ce qui en est. Ils ayment mieux veoir vne guerre ciuile en ce Royaume, voire iusques a y faire venir les estrangers, plustost que de consentir qu'ils se retirent en leurs maisons, sans diminution de leurs biens ny de leurs estats. Voila la reuerence & humilité de ceux qui presentent ladiète requeste. Voila le zele qu'ils ont à l'incolumité du Roy, comme ils disent. Lequel ils ayment tant & honorent, que plustost que d'aller en leurs maisons, ils ayment mieux veoir son Royaume en danger d'une ruine qu'ils disent euidente & ineuitable. Voila l'amour qu'ils portent à leur patrie: en laquelle ils appellent les armes estrange-res pour la piller, & (si Dieu n'y met la main) l'assubietir & la ruiner du tout.

Ils demandent puis apres vn Edict perpetuel sur le faict de la Religion. Et quād nous auons demandé l'entretènement de celuy qui a esté faict, iusques à la maiorité du Roy, ils ont dict que c'estoit vne demande inciuile

& defraisonnable: que c'est au Roy, quãd bon luy semble de chãger, limiter, amplier & restreindre ses Edicts. Et qu'en luy demandant que ce qui ia est ordonné par luy & son conseil soit gardé & entretenu, pẽdant sa minorité, nous voulõs tenir sa Maiesté en prison & captivité. Et toutesfois ils veulent que l'Edict qu'ils ont fait eux trois, soit perpetuel & irreuocable. Et si la raison qu'ils alleguent contre nous doit estre receuë, par icelle mesme nous conclurons aussi qu'ils veulent eux-mesmes tenir le Roy prisonnier en sa minorité & en sa majorité. Et faut bien dire qu'ils estiment pouuoir maistriser & commander non seulement à la personne du Roy, mais entierement à tout le Royaume: puis qu'en chose de si grande importance, & qui attire avecques soy tant d'inconueniens, ils osent presenter vne ordonnance qui n'est autorisee que de trois. Que feirent iamais dauantage Auguste, Marc Antoine & Lepide, quand par leur Triumvirat meschant & infame ils subuertirent les loix & la Republicque Romaine? S'ils eussent esté meus de bon-zele (comme ils disent) pacifique, & non seditieux d'un zele de Religion, & non d'ambition: ils n'eussent pas commencé par l'execution, comme ils ont faict: ils fussent venus sans armes, ils se fussent presentez avec humilité & reuerence, ils eussent remõstré les causes qui les mouuoient à ne trouuer bon l'Edict de Ianuier, ils eussent supplié treshumblement le Roy & la Royne de regarder avecques leur cõseil, avecques l'aduis des Par-

lemēts, & des autres estats, si par autre moyen on pour-
roit remedier aux troubles à la conseruation de l'hon-
neur de Dieu, & de la seureté & grandeur du Roy & de
ce Royaume. Parlans ainsi, ils eussent mōstré qu'ils n'e-
stoyent guidez d'autre passion que du zele de leurs con-
sciencs. Mais leur façon de faire descouure assez que la
Religion leur sert pour auoir suyte, & mettre diuorce
entre les subiects du Roy: & avec vne part, cōioincte a-
uec les estrāgers, se rendre maistres & seigneurs de tout.
Ausquels ie suis contrainct de dire que les Princes du
sang (desquels ils ont esté de tout temps ennemis, & les
ont reculez autant qu'ils ont peu) n'endureront point
que les estrangers, & ceux qui ne sont appelez au gou-
uernement, se messent de faire des Edicts & des ordon-
nances en ce Royaume. Or ils veulent & demandent
que l'Eglise Romaine (qu'ils appellent Catholique &
Apostolique) ait lieu, & soit seulement recogneue en
France: & à ceux de la Religion reformee soyent deffen-
dus les presches & les Sacremens. C'est vn Duc de Guy-
se, Prince estranger, vn sieur de Montmorency, & vn
sieur de saint André qui font vne ordonnance contre
l'Edict de Ianuier, accordé par le Roy, & la Royne sa
mere, le Roy de Nauarre, les Princes du sang, avecques
le Conseil du Roy, & quarente des plus grands & nota-
bles personnages de tous les Parlemēs. Ce sont trois qui
font vne ordonnance contre la requeste presentee par
les Estats, cest-assauoir la noblesse & le tiers estat, à

Orleans, & depuis à saint Germain. Lesquels deux Estats requirent qu'il pleust au Roy bailler temples à ceux de ladicte Religion reformee. Ce sont trois qui font vne ordonnance qui ne peut estre executee sans vne guerre ciuile, sans mettre le Royaume en danger d'une euidente ruine. Et eux mesmes le voyent, & le confessent. Et voila comment ce Royaume leur est obligé, & quel fruit apporte leur sçauoir & leur bon zele, ou (pour mieux dire) leurs pratiques, leurs menees & ambition de commander.

Le Duc de Guyse & ses freres, faisans ceste entreprinse de dechasser ceux de la Religion reformee, quelque bon zele qu'ils pretendent auoir, ne sçauoyent nier que volontairement ils ne cherchent troubler & mettre en danger ce Royaume. Ayans veu ce que pour semblable dessein leur succeda si malheureusement en Escosse. Au quel pais l'une part & l'autre viuoyent en paix sous l'obeyssance de ceste bonne & vertueuse Princesse la Royne douairiere: iusques à ce que par l'autorité desdicts de Guyse fut publié que le Roy n'entendoit permettre que autre Religion fust receüe audict pays que celle de l'Eglise Romaine. Qui fut cause que quelque petit nombre de gens de basse condition s'esleuerent, & prirent les armes qui furent en peu d'heure separez par la prudence de ladicte Dame, & layde de la Noblesse. Et deuoit ce commencement seruir d'admonnestement audict de Guyse, du danger qu'il y auoit de plus grand

troubles, s'ils ne se desistoyēt de leur entreprinse. A quoy toutesfois ils ne voulurent entendre: ains(au contraire) plus eschauffez que iamais, escriuirent à ladicte Dame des lettres fort rigoureuses, en la taxant d'auoir vsé de trop de douceur, & principalement en la cause de la Religion. Et que pour corriger les fautes passees, il estoit necessaire de mettre la main au sang, & sur les principaux. Et pour ce faiēt enuoyerent deuers elle l'Euesque d'Amyens, & le sieur de la Brosse. Lesquels pour se mon-
strer à leur arriuee bons catholiques Romains voulurent contraindre vn chascun d'aller à la Messe, reprochoyent souuent à la dicte Dame, & au sieur d'Oysel, qu'ils auoyent tout gasté: publierent leur dessein qui estoit d'vsfer de la force. L'Euesque d'Amyens, comme Legat du Pape, attendant les bulles de sa legation, promettoit de reduire la pluspart de ceux qu'il disoit foruoyez. Le sieur de la Brosse promettoit en vn mois exterminer ceux qui ne vouldroyent reuenir. Et pourautāt que l'auarice est tousiours accompagnee de la cruauté, ils regarderent de bon œil les terres & possessions de la noblesse: escriuirent à ceux qui les auoyent enuoyez, qu'en rendant le peuple taillable, & faisant mourir les gentilzhommes qui auoyent suyui la Religion reformee, il y auoit moyen d'augmenter le reuenue du Roy de deux cens mil escuz par an, & de pouruoir mil gētilz hommes François & de maisons & de biens, pour y demourer cōtinuellement, & y seruir cōme pour vne gendarmerie

darmerie ordinaire . Ceste condition fut volontiers receue & embrassée avec grandes louanges , de ceux qui en estoient les auteurs . Et quelque remonstration que ladicte Dame & le sieur d'Oysel sceussent faire , que les Escossois n'estoyent pas aysez à dompter : que si lon les vouloit contraindre pour le faict de la Religion , ils se mettroient és mains des estrangers : avecques l'ayde desquels , pour s'asseurer du tout , ils dechasseroient entierement le nom & obeissance de l'Eglise Romaine : & que de là on mettroit en danger l'estat & ce qui appartenoit à l'autorité du Roy & de la Royne . Tout cela fut reietté . La Royne estoit vne bõne femme : mais elle auoit tout gasté . Le sieur d'Oysel estoit vn sot , & n'auoit point d'entendement : par ce qu'il ne vouloit perdre ce qu'il auoit par son labeur & par sa diligence , si longuement & fidelement gardé . En fin , ces messieurs (qui sont si clair voyans) besongnerent si bien par leurs discours , que les plus grans & la pluspart de la noblesse s'esleuerent , & prindrent les armes , s'accompagnerent de leurs anciens , & (comme par maniere de dire) naturels ennemis . Et en peu de temps dechasserent tous les prestres : qui toutesfois eussent vescu & continué leur estat , s'ils se fussent voulu contenter d'vne paix commune entre les vns & les autres . Tellemēt que & le nom de Guyse & le nom de l'Eglise Romaine fut renuoyé deça la mer . Et ainsi ceux-la qui auoyent voulu tout auoir , perdirent le tout . De cest exemple se deuoyent seruir le

Duc de Guyse & ses freres,& recognoistre la faute qu'ils auoyēt faite, de mettre en dāger ce Royaume d'Escoffe: deuoyent s'abstenir de ces paroles qu'ils ont si souuent redites & publiees. Qu'il faut que l'vne des deux Religions soit dechassée de ce Royaume, & que les vns cedēt aux autres. Ce ne sont point paroles de subiects ou seruiteurs: ce sont paroles d'un Roy en sa maiorité, & qui fust conseillé non seulement de son conseil ordinaire, mais des plus sages & des plus aduisez des trois estats de ce Royaume. Car là où il est questiō de diminuer la force d'un Roy, & de la moitié (pour le moins) de sa noblesse & du peuple qui est de seruice, il ne faut pas y aller si sommairement: tant par ce qu'il n'y a Roy qui ne sentist aussi viuement telle perte comme si lon luy tailloit la moitié des membres de son propre corps, qu'aussi pour le dāger qu'il y auroit (au moins en ce temps) que nostre Roy pour sa ieunesse ne commande qu'à l'opinion & à l'appetit d'autrui: que ceste moitié se voyant persecutee en lieu de s'en aller ne voulust chasser l'autre. Et quant à ce qui concerne le faict de la Religion Romaine, ceux qui veulent avec les armes la rendre seule en ce Royaume, la mettent en danger de la faire diminuer tous les iours, puis qu'ils la remettēt à la force & à la protection des armes. Et eust mieux valu contenir les vns & les autres en paix & vniō, & ne disputer de ces matieres qu'avec le papier & le parchemin, & non avec les meurtres & effusion de sang: qui (peut estre) auront tellemēt irri-

té Dieu, & appelé sa vengeance, que les prestres & ceux de leur ordre (qui pouuoÿét viure en repos en leurs charges, & iouÿſance de leurs biens) feront les premiers à porter le hazard & le danger de l'indiscretion, & (qui pis est) de la fureur du peuple. Et quoy qu'il en soit, la protection de ces messieurs les requerás ne leur peut apporter qu'une certaine perte & le danger d'une grande ruine. Car puis qu'ils estoÿent asseurez de n'estre molestez de leurs vies, en leurs charges, ny en leurs biens, ils ne pourroÿent dire qu'ils eussent occasion aucune de se plaindre: s'ils ne veulent faire semblant d'auoir eu pitié de la perte de nos ames. Mais qui les en auroit rendus si soigneux depuis quelque temps, attédu qu'il n'y a Euesque ny curé qui puisse monstrier en auoir tenu aucun compte par cy deuant? Puis donc que de nostre part estoit resolu qu'on ne leur donneroit aucun empeschement, quel besoin estoit-il de les nommer en ceste querelle, & se couvrir de leur nom & de l'Eglise Romaine? N'est-ce pas pour irriter & acharner les vns contre les autres? N'est-ce pas le moyen de rédre odieux cest ordre à tout le peuple, qui en estoit ia par trop offésé? N'est-ce pas pour attirer, si Dieu n'y met la main, parmi ceux qui viuoyent en paix, une mesme haine enragee côme celle d'Escoſſe? Et quelque chose qui en aduienne, puis qu'il faut que l'une des deux parts soit exterminée, & que les requerás le veulent ainsi: aduint-il iamais en ce Royaume vn si piteux spectacle que cestuy-la? Y a-il profit, y a

il cōmodité, y a-il grãdeur (quand ce seroit pour le Roy mesmes) qu'on deust achepter si cheremēt, & avec vne si grãde ruine & desolation? Quels pardons, quelles indulgences, quelles bulles du Pape pourrōt iamais reparer la perte du sang qui sera respādu pour ceste querelle? Ces trois requerans pourrōt dire au Roy quelque iour, que pour defendre ce que personne ne vouloit impugner, pour conseruer la Religion Romaine (à laquelle personne ne vouloit donner empeschemēt) ils ont fait ou voulu faire perdre la moitié de sa noblessē & des meilleurs subiects de sa Maiesté. Lon leur pourra, & avec la verité, reprocher que tout ainsi que par leurs opinions feintes & simulees ils mirent le Royaume d'Escoffe en danger d'une euidente ruine, & furent cause d'une grande & piteuse effusion de sang: avec la mesme opinion, le mesme dessein, & les mesmes Ministres, ils ont espendu la pomme de discorde parmy ce Royaume, & tellement incité les vns contre les autres, que ces trois requerans & leurs ministres seront remarquez à la posterité, pour seuls autheurs de tous les maux & inconueniens qui aduiendront à ceux de la Religion reformee & de l'Eglise Romaine.

Or de peur de n'exciter assez de troubles, ils demandent que tous officiers, soyēt domestiques, soyent d'ordonnance, de iudicature, de fināces, & autres ayans administration ou commission, & pareillement les Prelats Ecclesiastiques feront confession de leur foy. Et les

dilayans ou refusans seront priuez de leurs estats & de leurs pensions, & les gens de l'Eglise de leurs benefices. Ce sont trois personnes priuees qui font vne loy contre les loix de ce Royaume. Car il ne fut iamais veu ny entendu que les Roys predecesseurs ayent contrainct leurs subiects à faire cōfession de foy autre que celle du Symbole. C'est vne loy contre les loix Ecclesiastiques. I'entend les loix Ecclesiastiques à leur façon, prinſes des Conciles & de ceux qu'ils approuuent anciens peres. Et ce monsieur qui leur a dicté la requeste, & qui est si ſçauant, pour pallier son mauuais deſſein en deuoit amener quelque exemple: ce qu'il ne ſcauroit faire, s'il ne veut apporter en ce Royaume l'inquisition d'Eſpagne. Laquelle a eſté iugee ſi inique de toutes les autres Nations, qu'il n'en y a pas vne qui l'ait voulu accepter. Et pour en dire ce qu'il en eſt, ceſte loy eſt la ratoire qu'ils auoyent tendue à Orleans peu auant la mort du Roy François dernier decedé: & laquelle ne peut tēdre qu'à la ruine & entiere ſubuerſion de tous les ſubiects du Roy. Car leſdicts requerans ſçauent bien qu'il y a dix mil gentilshommes & cent mil hommes aptes à porter les armes, qui n'abandoneront ny par authorité, ny par force la Religion qu'ils ont prinſe, n'endureront qu'on leur oſte les preſches, ny l'adminiſtration des ſacremēts. Et eſtant le Roy mineur, comme il eſt, il n'appartient à perſonne de leur commander à vuyder le Royaume. Et ſe deffendront avecques les armes contre ceux qui en

cest endroit voudront abuser de l'autorité de sa Maie-
sté. Ceste grande & notable compagnie ne peut estre
vaincue ny deffaite, quand bien il aduiendroit (ce que
Dieu ne vueille) sans la ruine de ceux qui les auroyent
assaillis. Tellement que les estrangers que ia ils ont ap-
pellez (qui est crime capital & de leze Maiesté) rappor-
terót le fruiet de ceste guerre ciuile. Et pour conclusion,
parlent comme ie fay & pour moy & pour beaucoup de
grans Seigneurs de ce Royaume, & pour dix mil gen-
tilshommes, & autres de nostre suytte, qui voulons vi-
ure & mourir sur ceste querelle: ie dy que ladicte ordon-
nance a esté faicte par trois personnes priuees, qui de
leur autorité ont cassé celles qui ont esté faictes par le
Roy & son conseil. Et pour l'executer, auant que la
consulter ont prins les armes: & se sont saïsiz de la per-
sonne du Roy. Iedy dauantage, que ladicte ordon-
nance est contre les loix de ce Royaume, la coustume
de toute la Chrestienté, contre l'Edict de Ianuier, con-
tre la requeste des Estats, contre le repos & la seureté des
subiects du Roy, & contre la conscience, l'honneur, la
vie & les biens d'un grand & infiny nombre de gens de
bié, & lesquels ont tasché de ruiner, de faire mourir les
vns & dechasser les autres, sous le manteau & la cou-
verture de la conscience & de la Religion. Ceste ordon-
nance aussi est faicte contre la liberté d'aller au Concile.
Et de ce, se deuoit aduiser celuy qui les a conseillez. Car
s'il est dict qu'en ce Royaume on face confession de foy

telle qu'ils demandent, & declaration de retenir & conseruer & la doctrine & les ceremonies de l'Eglise Romaine, c'est vne sentence donnee contre ceux de l'Eglise reformee. Et ne faut plus que nos Ministres ny ceux des autres nations aillent au Concile, puis qu'ils sont condamnez sans les auoir oys. Et auant que ledict Duc de Guyse & le Cardinal son frere puissent mettre en auant ceste ordonnance de faire confession de foy, il faut qu'ils renoncent à plusieurs articles de la confession d'auguste, qu'ils ont accordez à Sauerne, & promis à vn grand Prince d'Allemagne de les faire obseruer en France. Et s'ils disent le contraire, qu'ils le mettent par escript : & leur sera respondu par ceux à qui ils ont faict la promesse. Il faut aussi que ledict Cardinal declare par escript qui soit veu & publié, s'il persiste en ce qu'il a autresfois dict à la Royne, en presence de beaucoup de gens de bien, touchant les articles de la transubstantiation, de garder & porter le saint Sacrement, de la iustification, de l'inuocatio des saints, du purgatoire, & des images. Desquels articles il en parloit contre l'opinion de son Eglise Catholique, Apostolique, Romaine.

En la requeste est peu apres faicte mention de la rupture des images Et est requis par ceux qui l'ont presentee, que les dommages soyent restaurez, & les delinquans chastiez. Sur quoy ie repōdray ce mot, q̄ le sang de ceux qui ont rompu lesdictes images, & qui a esté espādu par quelques vns des nostres, qui les ont voulu reprimer, &

depuis par autorité de Iustice, en ce mesme lieu d'Orleans, tesmoignera tousiours deuant Dieu & deuant les hommes combien ces executions faictes par vn populace m'ont esté desplaisantes, pour beaucoup de respects: & singulierement parce que c'estoit contreuenir à l'Edict de Ianuier, & aussi à l'association que nous auions faict publier quelques iours deuant. Mais si la rupture des images merite punition, comme i'en suis bien d'aduuis (d'autāt qu'elle est faicte cōtre l'ordonnance du Roy) quelle punition se promettent ceux qui s'accoustrent si bien du nom du Roy, des meurtres, qui par eux mesmes & à leurs exemple & sollicitation ont esté faicts à Vassy, à Sens, à Castel-nau d'Arry, & à Angers? Esquels lieux on scait bien qu'il y en a eu cinq cens hommes ou femmes tuez, non pour autre occasiō que pour la Religion. Celuy qui a dicté la requeste deuoit examiner sa conscience, & recognoistre qu'il ne se trouue pas que l'image morte ait iamais crié vengeance: mais le sang de l'homme (qui est l'image viue de Dieu) la demande au ciel: & l'attire & faict venir, quoy qu'il tarde.

Requierent puis apres les requerans, ou (pour mieux dire) les cōmandeurs, que les armes soyent ostees à ceux qui ne les ont prises par expres commandemēt du Roy de Nauarre: & que ceux qui se sont ainsi armez, soyent declarez rebelles & ennemis du Roy & du Royaume. Or ie demanderoye volontiers à ces seigneurs qui se disent si sages, & tant amis du repos public si leur requeste ne

ste ne tendoit pas à tailler toute esperance d'accord, puis qu'ils requierēt que moy & ceux qui sont avecques moy soyent declarez rebelles & ennemis du Roy & du Royaume. Car ils ne disent pas que ceux qui ne voudront laisser les armes, mais ils disent, ceux qui se sont ainsi armez, soyent declarez rebelles. Qui est vn article qui merite autre respōse que par escript. Et i'espere dans peu de iours de les aller trouuer, & disputer par les armes avecques eux: s'il appartient à vn estrange & deux petits cōpagnons tels que ceux là iuger vn Prince du sang & les deux parts de la noblesse de ce Royaume, rebelles & ennemis du Roy. Et ne faut poinct qu'ils mettent en auant le nom du Roy de Nauarre: duquel ils ont esté à tout iamais ennemis capitaux, du tēps des autres Roys: ils l'ont reculé & tenu en arriere autant qu'il leur a esté possible, voire iusques à ne vouloir faire mention de luy ny de ses droicts, quand il a esté question de faire quelque traicté de paix. Ils ne sçauroyent dire qu'il ait eu iamais chose qu'il ait demandee, soit pour luy ou pour autrui. Ils ne sçauroyent dire qu'on ne luy ait osté en toutes occasions le lieu qui luy appartenoit à commander, soit en temps de guerre ou en temps de paix. Et pour l'acheuer du tout, du temps du Roy François dernier decedé ils l'ont tenu en moindre rang que s'il eust esté le plus pauvre gentilhomme de ce Royaume. Et puis le firent venir par menaces: empescherent qu'homme n'osast sortir d'Orleans, pour aller au deuant de luy: deffen-

dirent à tous Cheualiers de l'ordre & autres gentils-
hommes de le visiter, ne communiquer aucunement
auecques luy : enuoyerēt vn Mareſchal de France auec-
ques cauallerie & gens de pied, pour ſaiſir tous ſes pays,
& appellerēt au butin les eſtrangers : cōme tout le mon-
de ſçait bien. Et voyans leur deſſein interrompu par la
mort dudiēt feu Roy François, lon ſçait quels conſeils
furent tenus pour ſ'en deffaire du tout : reſiſterent touſ-
iours à ce qu'il n'eût aucune autorité de commander.
Lediēt de Guyſe, par le conſeil du Conestable, diſt il y a
vn an, que à la priere ny au commandement du Roy de
Nauarre il ne ſe retireroit de la Cour. Le Mareſchal de
ſainct André en plein Conſeil luy diſt, i'obeiray au Roy
& à la Royne, & non à autre. Et à ceſte heure ils ſe veul-
lēt aider du nom du Roy de Nauarre, qu'ils ont ſi mal-
heureuſemēt traicté par le paſſé. Et veulent ſe ſeruir de
ſon nom pour ruyner ſon propre frere. Et d'autant que
lediēt ſeigneur Roy de Nauarre eſtoit autant aimé que
il en fut iamais, ils mettent peine de le faire hair à la plus
grand' part de la Nobleſſe & du peuple : eſperans que
ſ'ils peuuēt du tout le diſtraire de l'amour de ceux qui ſi
longuement & ſi fidelemēt l'ont aimé, ils auront moyen
de le meſpriſſer & mal traicter, cōme ils ont faiēt par cy
deuant. Mais la trōperie auecques laquelle ils ont cuidé
paruenir à leur deſſein, a eſté cognue & deſcouuerte, &
ſera bien toſt publiee par toute la Chreſtienté, à la honte
& conſuſion de ceux qui en ont eſté les miniſtres.

Sur ce qu'ils demandent que le Roy de Nauarre assemble des forces pour executer les choses susdictes, ils monstrent assez ou vne grande imprudence, ou vn grand desir qu'il n'y ait point d'accord entre nous. Car puis qu'ils ont deliberé avecques les armes contraindre ceux de la Religion reformee à ce qu'ils demandent, ils ne deuoyent pas le dire iusques à ce que nous eussions esté desarmez. Et puis qu'ils nous ont si ouuertement faict entendre leur dessein, nous-nous garderons d'estre trompez, & de laisser les armes qu'avecques bonnes enseignes.

Requierent d'auantage, que lon prêne quelques autres articles qui seront baillez par la Cour de Parlement de Paris. Et en cela ils mōstrent le peu de compte qu'ils tiennēt & de la Royne & du Roy de Nauarre, & du cōseil du Roy. Et m'esbahy qu'au moins ils n'ont eu respect aux six grans & sçauās personnages qu'ils ont mis au conseil: desquels lon pourroit bien tirer quelque bon & notable aduertissemēt. Et ne fay aucun doubte qu'audict Parlement n'y ait beaucoup de gens de bien, & qui en vertu, en sçauoir & en preudhominie representent l'ancienne integrité de ce Senat. Mais les trois requerās y ont donné si bon ordre, que par benefices, par offices vendus, & autres à demy donnez & par autres moyens illicites & indignes d'estre endurez en ce Royaume, ils en ont acquis vn tel nombre à leur deuotion, que les bons sont bien souuent surmontez par les mauuais. Et

de ce fuffira alleguer que la legation a esté reffufée par deux fois fuyuant l'Edict faict & arresté à la requeste des Eftats, publié & emologué par toutes les Cours de ce Royaume. & (qui plus est) leur refus estoit fondé sur le deuoir de leurs consciences, & de la conscience du Roy. Et toutesfois sans attendre autre iuffion que d'une simple lettre du cachet, ils l'ont approuuee & receüe par la follicitation & menees de ces trois, & de leurs ministres. Voyla l'esperāce que nous auons d'y trouuer vn bon aduis.

Par vn memoire presenté auecques la requeste ils requierent que les villes soyent remises entre les mains du Roy, auecques nouueau serment de fidelité. Et voudroyent volontiers (comme ils ont faict du temps du Roy François dernier decedé) persuader au monde, que ceux qui ne veullent porter leur tyrannie, sont ennemis du Roy. Il deuoit suffire au Duc de Guyse & à ses freres, qu'ils se soyent vne fois aydez de ceste finesse, au grand desplaisir de beaucoup de gens de bien: quand pour se defendre de ceux qui leur vouloyent mal, ils couuroyēt leur querelle de celle du Roy. Si quelcun par iniure particuliere ou publicque estoit seulement soupçoné, d'auoir mal parlé d'aucū d'eux, il estoit emprisonné, persecuté, & par lettres patentes déclaré ennemy du Roy & de l'estat. Et pour autant que ceste belle inuētion leur a succédé vne fois, & s'en fussent bien mieux aydé, si Dieu n'y eust mis la main: ils y voudroyent encores re-

uenir. Et combien qu'il n'y ait aujourd'huy homme en ce Royaume (au moins de ceux qui sont de nostre part) qui ne soit prest d'exposer & la vie & les biens pour le seruice de nostre Roy. Et toutesfois ils nous disent rebelles, il n'y en a point de nostre part (& Dieu en est tefmoin) qui ne hazardast volontiers sa vie, pour preseruer de mal & d'inconuenient celle de nostre Prince, que nous aimons vniquement, & honorons comme pour vn singulier & precieux dō que Dieu nous a fait. Il n'en y a point d'entre nous qui ait prins les armes pour demander quelque chose que ce soit au Roy ny à la Royne sa mere, ny au Roy de Nauarre. Nous ne demandōs point autre Roy, autre Prince que celuy qui est nostre naturel seigneur. Nous ne demandons point auoir sa personne en main, ny l'autorité de le gouuerner. Nous ne luy demandons point diminution de tailles, de subsides, & des droicts qui luy appartiennent: mais, au contraire, les nostres n'ont iamais murmuré, quelque charge qui leur ait esté imposée. Et ont offert, & offrent encore, d'accorder liberalement tout ce qui luy plaira leur demander, autant que leurs biens & leurs facultez se pourront estendre. Les villes qu'on dit estre rebelles, n'ont point chagé de maistre ny de seigneur: recognoissent plus que iamais l'obeissance qu'elles doiuent à nostre Roy. Et que lon voye la responce qu'elles ont fait: lon trouuera que les armes ne sont pas leuees contre le Roy. Plustost mourir que d'y auoir pensé. Lon trouue-

ra que nous n'auons requis chose qui concerne la personne, l'autorité, le gouuernement ny la vie de sa Maieſté. Lon trouuera que les armes ſont priſes contre la maiſon de Guyſe, Conestable & Mareſchal ſainct André. Et encores c'eſt avec telle modeſtie, que nous ne demandons leurs biens, leurs vies, ny leurs eſtats. Parquoy celuy qui voudra dire que nous portons les armes contre le Roy (comme ils voudroyent faire entendre) il faudra qu'il confeſſe qu'il eſt calomniateur, ou bien qu'il voudroit les ayder à vſurper ce Royaume, & prendre le nom & les effectſ de Roy. Et ceux qui confeilleront au Roy de prendre leur protection, & de leur preſter le nom, les gens & l'argent, tout ainſi que ſi nous faiſions la guerre à ſa Maieſté: tels cōſeillers ſerōt (quoy qu'il tarde) quelque iour appelez en iugemēt. Et faudra qu'ils rendent raiſon comment ils ont peu conioindre la querelle de trois particuliers avec celle de ſa Maieſté, & de tout le Royaume. Il faudra qu'ils rendent compte de l'argent qui aura eſté deſpendu en ceſte guerre, contre les ordonnances des eſtats du conſeil du Roy, pour defendre le bon plaifir de ces trois particuliers. Autre choſe ne ſe peut dire que le bon plaifir: c'eſt aſſauoir d'eſtre à la Cour ou en leurs maiſons. Et ſi tels Conſeillers ont des biens pour en reſpondre, i'eſpere qu'en fin la guerre aura eſté faite à leurs deſpēs, & des principaux autheurs. Sur les biens deſquels ie preten prendre ce qui aura eſté deſpendu, & le remettre au threſor du Roy, au

soulagement du poure peuple.

Pour la fin & cōclusion de la requeste, ils protestent que si lon execute entierement ce qu'ils veulent, ils sont prests de se retirer en leurs maisons, voire (si besoin est) d'aller à la fin du mōde. Tellement que nous sçauons à present à quel temps nous pouuons esperer qu'ils se retireront. Ce sera (disent-ils) quād ces choses susdites seront faites, accomplies, & executees. C'est à dire, quand l'Edict de Ianuier sera par leur autorité cassé: quād par leur ordonnance tous les Ministres seront dechassez: quand ceux de la Religion reformee ne pourront ouyr sermon, ny prendre Sacrement que de ceux de l'Eglise Romaine: quand tous ceux de ladiète Religion seront priuez de leurs estats, de leurs charges & de leurs offices & aussi despouilleez, & réuoyez en leurs maisons, exposez à la fureur de ceux qui les voudront manger: & avec la liberté de leur faire perdre la vie, s'ils font aucun scandale: entendant scandale (comme ils ont fait par le passé, & ainsi a esté iugé) n'aller point à la messe, s'assembler les voisins les vns avec les autres, pour prier Dieu. Voyla qu'ils appellent scandale: quand nous serons declarez rebelles, & ennemis du Roy & de son Royaume pour auoir prins les armes: & quand on les nous aura ostees, & que personne n'en pourra auoir que pour executer leur ordonnance. Voyla les conditions que nous pouuons attendre de ces messieurs. Voyla le plus honnestes dessein où ils tendent. Et se gardent bien de dire à

quel poinct ils cuident par apres paruenir . Or soit ma
demande rapportee & mise en parragon avec la leur . Ie
demande l'entretènement de l'Edict de Ianuier : & ils
veulent de leur autorité le casser & abolir . Ils deman-
dent la ruine d'une infinité de maisons , tant de la no-
blesse que du tiers estat : ie demãde & desire que tous les
subiets du Roy de quelque qualité qu'ils soyent, soyent
maintenus & gardez en leurs estats, en leurs biës, & pre-
seruez de toute iniure & violence . Ils veulent extermi-
ner tous ceux de la Religion reformee : & ie desire que
nous soyôs reseruez au temps que le Roy fera en sa ma-
iorité, auquel temps nous obeirons à ce qu'il luy plaira
nous commander : & cependant que ceux de l'Eglise
Romaine ne soyent troublez, molestez ny empeschez
en leurs biens ny en l'exercice de leurs charges . Ils de-
mandent vne force d'armes pour executer ce qu'ils ont
entrepris : & ne regardent pas qu'ils côtraindront vne
infinité de gens de bien à se defendre . Ils ne regardent
pas le peu de moyen qu'on a de despēdre, ne les incom-
moditez & ruines que la guerre ciuile apporte . Et (qui
pis est) ils ont appelé, & se sont signez, à faire venir les
armes estrangeres : qui est à dire en bon langage, mettre
en proye ce Royaume . Au contraire, ie ne demande
point que les armes me demeurent en main, ie n'em-
ploye point l'argēt du Roy, ie n'appelle point les estran-
gers pour venir en ce Royaume . Et en ay refusé de ceux
qui m'ont esté presentez . Et Dieu en est tesmoin . Ie les

ay priez de n'y venir point, & d'empescher qu'autres n'y
vinssent pour moy ou contre moy, & demande & re-
quier(côme i'ay fait par cy deuant) que les armes soyent
posees tant d'un costé que d'autre, me faisant fort que
de nostre costé il n'y aura ny rebellion ny desobeissan-
ce: & que les armes n'aurent iamais tant de force ny de
vigueur en nostre endroit, que l'amour, la fidelité & o-
beissance que nous deuons à nostre Roy, pour lequel
nous ne ferons iamais difficulté d'exposer nos biens &
nos vies. Et auons fait cognoistre que nous ne sommes
pas des gueux, côme lon disoit: & que nous auons plus
de moyen & de force en main pour luy faire seruice à
son besoin, que n'ont avec toute leur suite & pratic-
ques, ceux qui nous veulent exterminer. Ils demandent
que nous soyons declarez rebelles, demãdent nos vies,
nos honneurs, & nos consciences. Nous ne demãdons
rien qui soit de leur vie, de leur hõneur, de leur bien, ny
de leurs consciences: ny leur souhaitons autre mal, si-
non celuy auquel nous voulons nous-mesmes nous o-
bliger: qui est qu'eux & nous, nous retirïõs en nos mai-
sons. Le tout suiuant les conditions plus amplemẽt de-
duites en nos declarations & protestations cy deuant
faites & enuoyees au Roy & à la Royne. Et ne faut poĩt
qu'ils dient que leur honneur y seroit interessé. Car puis
que nous acceptons la mesme condition, il n'y a point
de lieu de se plaindre ny doulour. Nostre demande est
iuste, d'autant qu'ils sont venus (comme plusieurs fois a

esté dit) vers leur Roy autrement qu'ils ne deuoyent, & avec des desseins qui ont esté cause des troubles que nous voyons à present. Et ont demandé & requis la ruine de tant de gens de bien, que quand bien nostre demande ne seroit si bien fondée comme nous l'estimons: encores faudroit-il plustost desplaire à cinq ou six, qu'ils sont, que de mal contenter les deux parts de ce Royaume: & qui sont de telle qualité & de telle force, que ceux-la mesmes qui les vouloyent dechasser, recognoissent & confessent aujourd'huy qu'il n'y a ordre de les assaillir, encores moins de les vaincre, sans l'ayde des estrangers.

Or encores qu'il n'y ait aucune comparaison de l'une à l'autre requeste, d'autant que l'une est pleine de iustice & d'equité, l'autre d'iniustice, de tyrānie & de cruauté. Et que ceux qui presentent celle qui est sanguinaire & violente, veulent, pour leur plaisir, & pour paruenir à leurs desseins, troubler ce Royaume: les autres ne demandent qu'un commun repos & tranquillité, & ne prennent les armes que par contrainte, & pour defendre leurs vies, leur honneur, leur conscience. La Royne peut iuger laquelle des deux requestes doit estre accordée ou reiettee. Et là où pour n'estre en liberté (comme elle n'est à present) ou bien pour quelque autre respect, elle n'en pourroit decider, & ne voudroit mal contenter ceux qui les ont presentees: il luy plaira, pour mettre fin à ces troubles, ordonner que lescdites deux requestes

soyent enregistrees en la Cour de Parlement de Paris. Que le l'Edict de Ianuier soit entretenu, & que les vns & autres posent les armes, se retirent en leurs maisons, iusques au temps que le Roy sera en sa maiorité, pour iuger qui a bien faict ou mal faict. Ou bien que la Royne en vueille decider avec l'aduis des estats, qui à ces fins seront conuoquez. Ce remede est cōmun à tous, & personne ne s'en peut plaindre ni douloir. Et est d'exécution si prompte & facile, que celuy qui ne voudra s'y accorder, ne pourra nier qu'il ne soit ennemy du Roy & de son Royaume. Et ne doit on point penser qu'il y ait hōme au mōde (s'il n'est mené de quelque affection particuliere) qui ne condamne tous ceux qui avecques si peu de chose ont peu & n'ont voulu esteindre ce feu & la flamme qui nous menace de tant de maux & inconueniens. Pourra aussi iuger vn chacun qui est le rebelle & ennemy du Roy, ou celuy qui offre laisser les armes, & se retirer en sa maison: ou celuy qui veut tout perdre plustost que de lascher la proye qu'il a faicte de la persōne du Roy. Et pour autant que de toute guerre ciuile lon ne peut attendre qu'une fin calamiteuse, & qu'il est malaisé de contenir les mains & la volonté des soldats, qui sont irritez contre ceux qui les veulent tyranniser: ie proteste deuant Dieu & deuant tous les hommes, que c'est a mon grand regret que ie pren les armes, & conduy ceux qui les portent. Et qu'avec mon sang ie voudroye pouuoir empescher les miserables effects dont la

guerre nous menace. Mais puis que lon n'a tenu compte de ma demande, puis que mes parties veullent estre mes iuges, & commãdent aujourd'huy soubz le nom & auctorité du Roy: ie proteste doncques que mon intétion ne tend sinon à mettre le Roy en telle liberté qu'il estoit il y a six mois, à remettre le gouuernement es mains de la Royne, avecques l'assistance du Roy de Nauarre: cõme il a esté dict par les Estats. Et contenir & preseruer la noblesse & le peuple de toute tyrannie & oppression de ceux qui ne sont appelez à leur commander. Et que de tout ceste entreprinse ie n'atten ni veux attendre (& plustost mourir) aucun proffit particulier, ni aucun dessein qui tende à l'auarice & ambition.

Mais veux rapporter toutesmes actiõs, & la grace que Dieu me fera, à l'honneur de Dieu, au seruice du Roy, & au repos & soulagement de tous ses subiectz. Faict à Orleans le dixneuvieme iour de may. Mil cinq cens soixante deux. Ainsi signé.

LOYS DE BOVRBON.





